



education

Department:
Education
REPUBLIC OF SOUTH AFRICA

NATIONAL SENIOR CERTIFICATE

KEREITE 12

SETSWANA PUO YA TLALELETSO YA BOBEDI (SAL)

PAMPIRI YA NTLHA (P1)

EXEMPLAR 2008

MADUO: 120

NAKO: 2 DIURA

PAMPIRI E E NA LE DITSEBE DI LE 11.

DITAELO

1. Araba dipotso TSOTLHE.
2. Karolo nngwe le nngwe e simololwe mo tsebeng e ntšhwa mme kwa bokhutlong jwa karolo moithuti a thalele.
3. Tlogela mola mo magareng a dikarabo tsa gago.
4. Kwala sentle ka mokwalo o o buisegang.
5. Tlhokomela mopeleto le popego ya dipolelo.

KAROLO YA A: TEKATLHALOGANYO**POTSO 1**

1.1 Buisa temana gore o kgone go araba dipotso tse di latelang.

Go nwa bojalwa go a amogelwa mo boaging ka bophara mme e bile go na le seabe se segolo mo matshelong a batho ba bantsi. Fa nnotagi e dirisiwa ka selekano, e ka dirisetswa go iketla kgotsa ya tswela boitekanelo ba motho mosola.

Ka maswabi ga go buiwe go lekane ka go nwa nnotagi go feta selekano, mme e le lebaka le le tlišang tlhakatlhakano mo botshelong jwa motho, tikologong tota le kwa tirong. Tirisobotlhaswa ya nnotagi e golagane le ditiro tsa bosenyi le dikotsi tsa dirori tse di masisi. E a tle e nne le seabe mo go ipolaeng. Le fa go ntse jalo, batho ba tswelela pele go ithokomolosa kgonego ya tshenyo le ditlamorago tse di kotsi tse di tlang ka nnotagi.

Nnotagi gantsi e dirisiwa jaaka sephaphamisi kgotsa seisagodimo. Seo ga se nnete gonne mo boammaaruring nnotagi ke seokobatsi se se okobatsang thulaganyo ya methapo. Go amega ga mmele ga paka e e potlana go ikaegile mo seelong sa nnotagi mo mading. Go ka simolola ka maikutlo a a lolameng mme ga isa kwa tatlhegolong ya pono, puo, nyalano ya dirwe le tekano ya mmele.

Gantsi kamego e e tlapoga mo diureng tse di mmalwa fa motho a se na go emisa go nwa. Kelo e ntsi ya nnotagi mo mading e ka thibela boboko go dira sentle mme ya feleletsa e baka kidibalo. Go fetisa selekano ga kelo ya nnotagi mo mading e feta 0,5 go ka nna kotsi e e bolayang. Paka e telele ya tirisobotlhaswa ya nnotagi e ka senya boitekanelo ba mmele.

Kgonego ya kotsi ya boitekanelo e akaretsa bolwetse ba go thatafala ga sebate, mathata a mala le mogodu, tshenyego ya pelo le go se dire sentle ga mesifa yotlhe. Batho ba ba nwang go feta selekanyo ba na le mokgwa wa go se je, ka jalo ba tlhoke tekano ya dikotla.

Tshenyego ya boboko e ka nna teng fa motho a tlhoka bitamine ya B2 mo mmeleng wa gagwe. Bolwetse Karsokov ke ba go tlhoka kgakologelo mme se se kaya gore go nna thata go gakologela dilo tse di fetileng le go ithuta dilo tse dintšhwa.

Motho le fa a ka lemoga bothata ba gagwe, keletso ya nnotagi e dira gore go nne thata go tlogela go nwa. Itsereganyetse. O batle thuso ka bonako jo bo kgonagalang.

[Monate wa Setswana, DS Matjila le ba bangwe]

DIPOTSO:

1.1.1 Naya temana e setlhogo. (1)

1.1.2 Kwala ditsela di le pedi fela tse nnotagi e ka dirisiwang sentle ka tsona. (2)

1.1.3 Ke ditiragalo dife tse pedi tse di golaganeng le tirisobotlhaswa ya nnotagi? (2)

1.1.4 Tlhopha tlhaloso e e maleba mo go B e e tsamaelanang le mafoko a a mo go A:

A	B	
Ditlamorago	Fokotsa	(1)
Methapo	Se se diragalang kwa morago	(1)
Okobatsa	Ditshika	(1)

1.1.5 Naya ditlamorago di le tharo fela tse di ka tlisiwang ke tiriso e e botlhaswa ya nnotagi mo dirweng tsa motho. (3)

1.1.6 Mokwadi o kaya eng fa a re, 'go nwa nnotagi go feta selekano go tlisa tlhakatlhakano mo botshelong jwa motho'? (2)

1.1.7 A polelo e, 'Go nwa nnotagi go feta, selekano go tlisa tlhakatlhakano mo botshelong jwa motho,' ke ntlha kgotsa ke kakanyo fela ya mokwadi? Tshegetsa karabo ka lebaka. (2)
[15]

1.2 Sekaseka setshwantsho se se fa tlase mme o arabe dipotso.



[Segarona: EE Pooe le ba bangwe]

DIPOTSO:

- 1.2.1 Naya setshwantsho se se fa godimo setlhogo. (1)
- 1.2.2 Tshegetsa karabo ya gago mo go POTSO1.2.1 ka lebaka. (2)
- 1.2.3 Mosola wa go dira jaaka Mmui mo setshwantshong se, ke ofe? (2)
- 1.2.4 Ditlamorago tsa go itlhokomolosa se Mmui a se kayang ke eng? Neela dintlha di le PEDI fela. (4)
- 1.2.5 Mmui a re o tla kgona eng thata? (2)
- 1.2.6 Mmui o kaya eng fa a re ditsala tsa me e tla nna dibuka? (2)
- 1.2.7 Lefoko *mothosetshabeng* le kaya eng? (2)

[15]**PALOGOTLHE YA KAROLO YA A: 30**

KAROLO YA B: TSHOSOBANYO**POTSO 2**

Buisa temana e e latelang ka kelotlhoko mme morago o e sosobanye ka temana e e ka nnang le dintlha di le lesome ka mafoko a gago mme bokao bo se fetoge. Netefatsa gore o akaretse dintlhakgolo le molaetsa wa yona.

Tshipi ya tswa, mme moruti a ya go Molatlhegi. Fa a bona moruti a lela go feta pele. A bolelela moruti gore o sokologile, o bone bontsi jwa dibe tsa gagwe. O batla go rapelelwa gore a itshwarelwe boleo jwa gagwe.

Khutsafalo ya ga Molatlhegi ya ama pelo ya moruti, mme a khubama ka mangole, a baya kgetsana ya madi ntlheng ya mojako, a re: 'A re rapele.' A thiboga, a kgakgamolola dithaba le mabota ka thapelo e e tswang mo pelong e e tlhomogileng; lentswe le roroma, go utlwala gore ke lentswe la motho yo o lelang. La bofelo dikeledi tsa pumpunyega.

A rapela ka pelo yotlhe gore kwana e e neng e timetse e bulelwe kgoro e tsene, mme leina la yona le kwalwe mo go kwadilweng maina a motlhapenyana o a neng a o disa.

E rile jaaka a tukhuthetse, a rapela, a tshologa dithito, a re na-na-na-na, morwa Monyamane, a re kgetsana ya madi ntle diatleng; a nyelela a tlogela moruti a ntse a duletse sekgapha. La noenoelala ka motse wa Seetebosigo, lenweenwee. Fa moruti a re, 'Amen,' a fitlhela maloba e le maabane, mosimane a ile. A gakgamala; a re o leba kwa mojakong mme a fitlhela kgetsana e go tsentsweng madi mo go yona e se teng. A ema madi; tlhogo ya nna mogote, a fitlhela dipota tsa ntlo di bina, di dikologa jaaka e kete o ne a ntse a ja mmamodikwadikwane. E rile fa a tswa molomo a re, 'Satane o nkotlile mo tlhogong'.

[Motimedi: DP Moloto]

PALOGOTLHE YA KAROLO YA B:

10

KAROLO YA C: TIRISO YA PUO**POTSO 3**

3.1 Buisa temana e e latelang mme morago o arabe dipotso tsa thutapuo.

Pelo ya ema tsi! motsotswana. A tlokoma, a fufula diatla, a bo a batla go kgaoganya lekwalo ka bogare. A le beela fa thoko, a hemela kwa teng gararo go fitlhela a tsidifalelwa. A tsaya lekwalo a le buisa a bo a le buisa, a bo a buisa, a belaela gore ga a buisa sentle. Ke tsona morwa Merakeng.

O sale a baya tlhogo ka segadi mo sennong sa koloi, a simolola go akanya gore o dirileng. O ya go raya mmaagwe a reng? O ya go raya Itshokeng a reng? Bathati ba thuto bona o ya go ba raya a reng? A duba thankga a setse a e dubile. A gopola mafoko a ga Itshokeng a tshalosa monate. A bona boammaaruri jwa ona. A akanya go ganela.

A nagana go ipolaya fa a gopola ditlhapa tsa ga mmaagwe. O ne a eleditse gore fa e le fa a rata go nyala Itshokeng go diragale, mme e seng ka mokgwa o. La bofelo a swetsa go kopana le ena a konotelela maikano a gagwe. A ipotsa gore o tla kopana le ena jang ka ba sa tshwanela go bonwa mo phatlalatseng mmogo.

Itshokeng o ne a mmeetse mo pepeneneng maikutlo a ga mmaagwe ka mmaagwe. Go setse malatsi a le mane fela dikolo di bo di bulwa. A gopola gore lekwalo la reng. A itse gore o tshwanetse go tsimakanya jaaka monna yo Itshokeng a mmoleletseng fa a le ena. A swetsa go kwala lekwalo, go direla fa a ka se ke a kgona go mmona. O tshwanetse gore a mo kgabelele a ile nokeng, a mo nee lona mme a mo tlhomamisetse ka molomo gore ena o swela dikano tsa gagwe, e bile ga a batle go itatola ditiro tsa gagwe. O rile a re phaphapha! A itharabologelwa, a fitlhela letlatlana le tshwere mme a sa le a ntse foo ka maneelo a dikonyana.

[Botshelo, Malepa, MSH Mothoagae]

DIPOTSO:

3.1.1 Naya bongtshadi jwa lefoko le le latelang mme morago o le dirise mo polelong.

(2)

Monna

3.1.2 Naya bontsi jwa mafoko a a latelang mme morago o a dirise mo dipolelong.

(a) Tlhogo

(b) Thuto

(4)

3.1.3 Nyenyefatsa maina a a latelang mme morago o a dirise mo dipolelong tse di tlabosang.

- (a) Lekwalo
(b) Koloji

(4)

3.1.4 Tlatsa diphatlha tse di tlogetsweng ka matlhalosi a a maleba mo masakaneng:

- (a) Ba mo fitlhetse ... ga tsela a robetse. (fa thoko, maabane, fa godimo)
(b) Re ba bone ... maloba. (kwa teng, ka bonya, matsetseleko)

(4)

3.1.5 Kwala malatodi a mafoko a a latelang o be o a dirise mo dipolelwaneng:

- (a) Monate
(b) Rata

(4)

3.1.6 Kwala polelwana e e latelang mo kganetsong:

A akanya go ganela.

(2)

3.1.7 Kopanya dipolelo tse di latelang ka lekopanyi 'gore' go bopa polelo e e tlabosang.

- (a) Ke tla falola dithuto tsa me.
(b) Ke ba boletse.

(2)

3.1.8 Lebaganya dipolelo tse di mo go A le ditlhaloso tse di nepagetseng mo go B:

A	B
Pelo ya ema	go senola
Go baya mo pepeneneng	go lela
	go tshoga thata

(4)

3.1.9 Fetolela mafoko a a latelang mo paka e e fetileng mme morago o a dirise mo dipolelong:

Sekao: tsamaya – tsamaile: O tsamaile sebaka se seleele.

- (a) Batla
(b) Rata

(4)

- 3.1.10 Mafoko a a latelang a na le bokao jo bo farologaneng kgotsa bokaobontsi. Dirisa lengwe le lengwe la ona mo dipolelong tse pedi go bontsha bokao jo bo farologaneng.

Sekao: Noka ya ga Itireleng e botlhoko fa a inama.
Pula e tladitse noka ka metsi./Mme o noka nama ka letswai.

- (a) Buisa
(b) Bona (4)

- 3.1.11 Naya lefoko le le lengwe boemong jwa dipolelwana tse di latelang:

- (a) A mmeetse mo pepeneneng.
(b) A mo tlhomamisetse ka molomo. (2)


- 3.1.12 Kwala mafoko a a tshwanang ka bokao mo boemong jwa mafoko a a latelang:

- (a) Nagana
(b) Koloi (4)

- 3.1.13 Siamisa matshwao a puiso a a fosagetseng mo polelong e e latelang:
Motho ba ne ba tlile pitlhong ya ga Mosidi le fa go ntse jalo, pule ena ga a tla. (5)

(45)

- 3.2 Sekaseka phasalatso e e latelang mme morago o arabe dipotso.



DIJO TSA AFERIKA

**O ka dijo fsa kwa gae wa kgora ka
tlhwatlhwa e e kwa tlase-tlase**

Mala le mogodu	R26,00	R15,99
Tlhogo ya nku	R19,00	R14,99
Sebete	R10,00	R 2,99
Maotwana	R15,00	R10,99

—→ Dijo tsotlhe di tsamaya le bogobe
 —→ O ka fetisa ka maši kgotsa mageu
 —→ Le kwa gae re go tlišetsa kwa ntle ga tuelo

**Leletsa 018 315 4578 kgotsa 078 298 2347
re tla go thusa ka ponyo ya leitho**

[Segarona: EE, Poee et al]

- 3.2.1 Ke ka ntlha ya eng fa setlhogo se kwadilwe ka ditlhaka tse dikgolo? (2)
- 3.2.2 A papatso e, e na le kgogedi? Tshegetsa karabo ya gago ka lebaka. (3)
- 3.2.3 Naya kgolagano magareng ga setlhogo le dinkgo tse di mo phasalatsong. (2)
- 3.2.4 Nopola mafoko a a bontshang gore o thusiwa ka pele fa o kopa thuso. (2)
- 3.2.5 Ke eng se se tlhotlhwa tlase go gaisa go ya ka phasalatso? (2)
- 3.2.6 Goreng ditlhotlhwa di isitswe kwa tlase. Naya lebaka le le utlwalang. (2)

- 3.2.7 Naya leina le le LENGWE le o ka le dirisang mo boemong jwa mala, mogodu le sebetse. (2)
(15)

PALOGOTLHE YA KAROLO YA C: 60

KAROLO YA D: (Literature)

POTSO 4

(This SECTION will be provided by the Provincial Education Department.)

PALOGOTLHE YA KAROLO YA D: 20

PALOGOTLHE: 120